

武夷新集

卷

肆

武夷新集

卷八

詩

楊大年先生武夷新集卷之九

邗關李 繡文素甫

鍾秀李葆貞守一甫全較

柘浦梅彥駒睂季甫

墓誌

故宋陝州芮城令清河張君墓誌銘

并序

君諱仲仁字子信其先清河人後徙建安之吳興遂
為著姓當王氏之據有閩越也曾祖從晟州里豪

右材兼文武仕至浦城制置副使工部尚書祖贊以
延賞之典署建州長史烈考仁邈檢校左散騎常侍
君卽常侍之次子也與伯氏同生居上爲弟風格甚
顚趣向多同里巷相疑家人莫辨每異其服飾以自
別焉君爰自童蒙服膺儒素韻宇冲粹智略縱橫李
氏之平建安也常侍辭疾家居累徵不起君策杖行
在叫閭上書朝論奇之卽授太常寺奉禮郎改秘書
省校書郎調補本州松溪尉江表平入朝歷衛州衛

縣主簿青州千乘尉達州巴渠簿兼令尉事遷陝州
芮城令以疾去官旅寓京師尋訪醫藥積日彌久美
疹愈滋肩舁而歸遂成沱痼清漳卧病旣十年而未
瘳東嶽斂魂俄三號而不返以咸平三年六月十八
日卒于仁風里之私第享年六十二其年某月日歸
葬于裏衝源順也君娶武寧章氏生子三人長爲舟
舉進士次垂象蚤亡次爲式女一人適進士章覃自
君之被疾也爲舟等夙夜扶持躬親左右靡神不禱

靡藥不嘗烝烝服勤目爲至孝予從祖兵部卽君之
元舅君之先夫人實予之尊姑某之與君猶丈人行
也平生遊處顧託乘以猶新舊館過從嗟脫驂之無
益謹銘翠琰以志佳城銘曰

天之德兮世濟美仕兩朝兮宰百里政之善兮疼何
美禱之久兮藥勿喜返九幽兮隣萬鬼人之生兮胡
至此

宋故主客員外郎直集賢院高平范公墓誌銘

并序

咸平五年二月戊寅集賢學士主客員外郎高平范
公暴中風眩終于上都甘泉坊之私第上以賢相之
後形於歎息戚里之懿優其賄賻兩宮遣使以赴吊
四隣聞喪而輟春交遊慟哭於寢門行旅咨嗟於閭
巷非椒蘭之德服媚於人梁棟之材中道而夭者疇
能痛惜如是哉公諱貽孫字餘慶濟南歷城人其先
歷虞夏商周實享世祿春秋戰國繼出名卿或以博

士顯東京或以詞人稱南國或以文雄史策或以信
著友朋蕃衍流光非可殫舉及公之大父守愚占數
京輔隨牒方州爲鄭州防禦判官命屈當時慶鍾後
嗣累贈太子太師王父故魯國公諱質以伊管事業
輔翼三朝以燕許手筆稱量天下繇司徒侍中罷爲
太子太傅魯國公而聞望益大恩禮彌渥將爲蒼生
而再起遽歎哲人之云亡然自五代以來百年之內
號良弼者不聞他人累贈至尚書令烈考諱旻以公

卿子著籍甚之稱在貴遊間有台輔之望文章組紉
於輦悅心計剖析於毛毳任給事中三司副使公累
謫宦事備國書由公上言追復官爵累贈至工部尚
書公以岐嶷之姿荷清白之訓思以學優入仕耻繇
父任爲郎不雜塵游專精墳史果以鄉里之薦亟預
賢能之書天子臨軒擢居乙等同年生率次補州郡
從事掾屬丞尉天子以公奕世載德肯構象賢欲其
起家不循常調解褐授大理評事雍熙中林胡犯邊

王師致討飛輓之役公實董之祇畏簡書大足兵食
凱旋遷光祿寺丞數月改秘書省著作佐郎面賜五
品服公以羣玉上帝之冊府蓬萊道家之藏室賢俊
咸集喜田蘇之與遊圖史實繁多黃香之未見於是
削章退食獻賦離宮卽日命公侍制文館數月以本
官直集賢院自是抽書石室侍宴瑤池歌黃鵠於建
章必陪賡載泛樓船於汾水卽奉豫遊以冠玉之英
標累聞題柱以燃箕之敏思幾至奪袍其風度閑詳

才調清婉士流推慕時論歸之登朝爲殿中丞遷太
常博士上卽位入省爲外郎皆領書殿之職公克續
緒業祇荷門閥寢丘遺產非有膏腴晏子舊居未更
爽塏而能孝以睦族儉以飭躬卽安先人之廬不違
王父之命雅好禮法尤重名節奉蒸嘗之祀馨德達
于神明事基功之親歡心洽於宗黨性嗜羣籍家藏
萬卷或手自繕寫或親加校■紺素畢陳敵秘書之
副本籤題具列同吳氏之西齋好事之名流布京轍

每風庭月榭蕭晨蘭夕必命儔嘯侶銜杯漱醪凡備
三益之交莫匪一時之雋漢庭太史或奏於聚星齊
國客卿無嫌於卜夜此亦冲襟高韻夔越常倫尚德
好賢有足多者嗚呼不幸今也其亡享年四十三斯
夭也已矣夫人高邑縣君李氏實淮陽丞相之妹洪
惟伯姊母儀萬邦作合先朝居尊長樂而夫人處貴
思降在富能貧周旋禮經輔佐君子得中饋之道彰
內助之賢舉案齊眉方期於偕老帷堂晝哭遽痛於

未亡一子克勤年十一歲天子憫之特授太常寺奉
禮郎月給俸緡俾終服紀固有奇骨荷茲高門雖在
童蒙已知孺慕有後之慶斯言不誣一女尚幼夫人
以喪無慮居禮當卽遠毀家襄事竭力送終伊洛之
間松檟斯在日月其吉龜筮無違卽以其年十一月
戊申扶護歸葬于河南府洛陽縣某鄉某里祔于先
塋側也嗚呼劫燼灰飛沉碑谷變非刻金石曷志桑
田以其投分生平託之銘篆巨源尚在庶稽紹之不

孤伯喈有言述太丘而無媿銘曰

范氏之先出於陶唐積德儲祉奕葉流光赫赫魯公
蟬綏貂璫陰德有後乃生夕郎於惟集仙肯構肯堂
穆然容輝煥乎文章行歸於周動罔不臧嗚呼難忱
今也卽亡洛水濱兮邛山址波東傾兮樹西靡從先
公兮夜臺啓新阡兮蒿里傳三世兮一身閔九泉兮
萬祀琢貞石兮志佳城人之生兮胡至此

宋故推誠保德翊戴功臣鄧州管内觀察使金

紫光祿大夫檢校司空兼御史大夫上柱國

長城郡開國公食邑二千四百戶食實封四

百戶贈戶部尚書錢公墓誌銘

并序

咸平六年秋七月詔鄧州觀察使彛代等州經略使
長城公歸京師疾故也上開宣室御武帳延登前席
勞問數四以公美疹初復未任朝謁賜告就第俾之
頤養汔九月勿藥有喜入謁未央宮自是五鼓登車
晨趨無廢三杯退食常膳載加朝野之人室家相慶

喜良臣之獲祐而斯文之未喪也十月戊寅宿戒知
友會竺乾之宇爲桑門之饌與開士輩談苦空讚真
諦俄起更衣偃然就枕若假寐焉少頃視之乃風眩
暴作如大醉狀肩舁歸第是夕以不起聞享年四十
有四上臨軒震悼遣使吊問法賻之數有加常等窀
穸之事悉從官給翌日詔贈戶部尚書天子以公母
夫人在喜懼之年有羸老之疾不克終堂之養實深
擠壑之痛特命中貴人面賜白金三十斤禮極哀榮

恩霑存歿君臣之際斯爲至矣公諱若水字淡成河南新安人蓋凌煙功臣巢國公九隴之後世胄閥閼譜牒存焉贈太子太保萼追封瑯琊郡太夫人王氏曾祖妣也贈太子太傅柔追封清河郡太夫人丁氏祖妣也尚書司門員外郎贈太子太師文敏烈考也往者公叅掌萬機追榮三代始贈孤卿再躋極品至於延鄉之命乃慰令伯之心蓋由夫錫羨貽謀重世始大臧孫於焉有後太丘以之無慙也公始在孩